

光緒山西通志

仕實錄八

錄六之八

山西通志第二百五十二

賜進士出身頭品頂戴兵部侍郎兼都察院右副都御史巡撫山西提督軍務張煦奉  
旨監修

國朝 嘉慶至同治

康亮鈞與縣人河督基田子以父蔭歷官工部郎中出守順  
德府涓縣之變繕完守禦訪擒逆匪無算所部肅然事平加  
道銜以親老乞歸定省之暇琴史爲娛時論以清節高之  
成錫瑜字蘊山文水人以經歷需次貴州歷官荔波知縣折  
獄明允甚著政聲道光中改授廣西萬承州同又理養利州  
事邊地風氣慄悍好關錫瑜抑奸除蠹力扶善良孱民冤無  
不伸土豪皆嚴繩以法所在肅然遷左州知州以上太原府  
賈履中字坦之太平人嘉慶己未進士授刑部主事歷員外

郎中總辦秋審以勤慎稱出爲甯夏知府正己率屬清積案  
培文風頌聲載道西甯湟中番賊滋事奉檄查辦有株連者  
悉與剖雪督修五渠邊民迄今利賴卒於官著有詩文集若  
干卷

高禮字郁周臨汾人由選拔授刑部小京官舉丁卯京兆試  
補主事歷職勤慎上官皆倚重之監督大西倉廉能稱最遷  
員外郎卒

蓋運長字景僕曲沃人壬戌進士選庶吉士改澄邁知縣嘗  
獲大盜數十名並巨礮二以其功分與營弁未幾海寇薄城  
竭力守禦寇知有備引去卓薦當遷遭憂歸服闋起知安化  
縣旋署甯夏未幾調皋蘭析繁剝劇庶政畢理事上不激不  
隨而於民事則殫心竭力不以爲瘁遷知肅州尋擢湖州府

知府會逆回張格爾叛六軍西征以習邊事調任蘭州進安肅兵備道先後總理軍需局籌備糧餉採買駝隻製造器械甚著勞績事平以病歸家居二年而卒

周維新臨汾人舉癸酉順天鄉試由內閣典籍授江南江防同知尋知海州爲治以厚風俗敦教化爲本居二年政通人和都人士撰胸陽輿頌以述其治績署徐州知府致仕歸家居急公尙義澤及里黨年八十五卒

常景周字濂堂曲沃人癸酉舉京兆試授潛山知縣道光初江淮大水出倉穀數百石以救災民先發而後請命並勸巨室輸資佐賑民遂得安調署六安州俗健訟以攻訐爲能下車訪得豪滑及蠹吏俱置諸法力革宿弊庶政一新歸家後丙寅荐饑出粟濟貧鄉里惠之

范炳監字牧亭臨汾人癸酉拔貢以知縣需次湖北連攝嘉魚松滋諸縣再知潛江修城弭盜儲粟賑饑興文教禦水患所在多惠政

楊學顏字心齋曲沃人丁丑進士除恩平知縣歷署佛岡廉瓊州府同知公正廉慈絲縷無漁於民卒於任

李作桐洪洞人舉戊寅鄉試歷知清河任邱臨城諸縣權延慶州知州所在有政聲道光丙申畿輔旱蝗蔓延時作桐宰臨城設粥廠賑濟饑民並捐廉助之民頌德不衰尋告歸學韓祖饒者相屬於道

李學宰字亦我洪洞人已卯魁於鄉授蒲縣訓導勤於課士縣令某初至催科苛急鄉民糾眾圍縣署勢洶洶學宰聞變急赴縣諭以大義眾皆帖服散去擢徐聞知縣下車訪獲巨

盜清釐積案頌聲大起時粵西寇亂方熾而縣城境薄且圯乃捐廉倡修之結鄉團爲守禦計未幾會匪起省城戒嚴當事札調各縣兵勇赴援學宰督所部趨應事平以軍功給藍翎七年調補電白旋升儋州知州同治中署萬州到官值陵水哮黎糾黨千餘潛應粵逆爲亂學宰偵知卽率兵勇乘不備直搗其巢賊倉卒驚潰生擒渠魁九十餘人州境肅然以老乞歸不果尋卒於官

張家本字虞三浮山人以貲耶擢知遵化州弭盜均差甚著能聲豐潤鹽梟滋事拒捕大府檄通永道會馬蘭鎮帶兵協剿家本以梟眾特畏罪負嵎聞兵至益震慄要犯無難立獲也卽單騎馳至海濱諭以利害眾皆號泣乞命遂自縛百餘人以獻比鎮道至而事平矣時豐潤令方以是案獲譴念其

山西通志卷一百五十二 仁賢錄  
母老失養以所獲首犯予之俾得復官一時多其能讓教匪  
事發以失察被議鐫級當事特奏留委辦豫東三省軍需恆  
捐廉俸以佐供億事平復任尋卒

傅天寵字荷菴汾西人由拔貢授井陘知縣以廉幹擢知養  
利州內遷工部員外郎轉刑部郎中終於遵義知府

王鶴年洪洞監生任浙江下沙場鹽大使署象山知縣下沙  
場地多瀕海居民屢遭水患鶴年捐廉募資築隄三層始免  
汜濫至今名爲王公隄

以上平陽府

韓因培字篤天臨晉人嘉慶壬戌進士歷官遂平太康知縣  
公正廉明政平訟理擢知睢州歷官十五年所至有政聲少  
不爲繼母所容奉事惟謹及作令板輿迎養性儉約而於母  
百計承歡色養備至

楊始昇猗氏人戊午魁於鄉官保康知縣多惠政嘗署黃安民苦多盜爲設條教嚴保甲恩威並用四境安謐及去士民送者皆爲流涕

謝丕績臨晉人甲戌進士授枝江知縣發伏摘隱剖決如流調吉水所在有聲

以上蒲州府

崔鈞長治人家貧以賣鐵爲業既羸入貲選廣西武宣巡檢年且六十矣嘉慶二年狆苗作亂官軍拒水紅江而營議戰未決鈞自詣軍門請言事大府以老師糜餼方傍徨無可爲計遽見之鈞因言曰能破狆苗者擺邏搖勇也能調擺邏搖勇者泗城故土司岑文淵也鈞請問行至文淵所往說之然官卑不足取信若得大府令箭一往蔑不濟矣許之三日而文淵至官軍渡江從之六戰皆捷生擒其魁狆苗平大府奏



請超擢西陰州知州部議不可擢舊州州判戴藍翎久之調補羅城縣再調馬平來賓劇盜張老二聚眾爲劫捕之數年大府以鈞能委代緝鈞固有所聞獨身出鎮南關移檄安南國王中國有逋者十三人在安南境或言王寶匿之王欲自明期三日以十三人者來安南王恐卽日發兵從鈞搜獲十一人以歸大府聞而大驚不敢隱遂以擅越界被劾革職發烏魯木齊効力贖罪鈞在烏魯木齊六年年七十餘嘗白都統某某等處有金銀氣可開鑛供新疆經費都統以爲妄不敢上聞鈞旣奉赦歸猶時時攘臂言之且曰此說行無復帑金出嘉峪關矣

嘉安府

任伯寅字子清汾陽人已未進士選庶吉士改刑部歷員外郎中轉御史署工科給事中卒在部每議爰書以詳愼稱及

居臺諫所言皆關用入行政之大性廉靜勵名節爲文章有奇氣於後進多所造就

馮大中字受生汾陽人己未進士由吏部主事薦擢御史少孤貧力學事繼母以孝稱在職負清望嘗佐重臣鞠獄畿輔或以賄進峻卻之巡城時王府優人車服違制重懲不少貸復請嚴定服色輦轂肅然出爲甯夏府知府憂歸尋卒

張之屏介休人己未進士授工部主事充軍機章京從秋獮木蘭以嫺騎射賞戴花翎出守榆林歲大饑請帑金三十萬普濟所屬寬除租賦邊民慶更生

郭泰成介休人之丑進士歷官戶科給事中有條陳多關於國計民生嘗力言常平義倉之弊

詔督撫確查如所請行時論偉之

李元豐字約亭介休人戊辰進士授雅安知縣地瘠民困於役捐萬金市良田以充役費羣德之平江渡爲諸葛武侯南征所經湍流險惡鑿石平之民不病涉遷蓬州知州

曹文昭字序三介休人舉丙子鄉試由河工知縣歷官淮陽道在南河幾三十年於隄工利弊實心講求爲所經畫匙失事歷署宿遷知縣高堰通判銅沛同知所至振興文教勤恤民瘼凡書院義倉育嬰養濟棲流諸善政以次修舉咸豐三年粵逆踞揚州督練勇赴高寶迎剿與雷侍郎查臬司諸軍相犄角賊卒不敢北犯方暑晝夜治軍以勞卒

贈大僕寺卿蔭一子入監讀書淮安山陽清河並祀名宦王畚字樹山甯鄉人由拔貢舉丙子鄉試任陽曲教諭擢知清鎮縣歷署玉屏清平諸縣貞豐定番知州以愛民爲心所

至之處必先訪詢利弊除陋規革蠹役惟恐稍遲民受其害  
於民事無不盡心而於命盜諸案倍謹嘗題楹自警曰閱世  
方知經事少臨民始覺負心多可想見其梗概焉引疾歸遂  
不復出

崔虞齡字庸徵汾陽人己卯進士授府谷知縣歲大祲緩征  
徭給籽種散倉穀千餘石減價平糶民困以蘇於縣北清水  
麻地溝諸處鑿路開渠以工代賑置學田百畝爲師生膏火  
資調富平擒獲刁匪按律定擬凶悍敘迹開濬金定堡三十  
九渠及直城六渠以興水利富平爲關中劇邑號難治虞齡  
聽斷明決不爲苛察一切以寬大處之吏不擾而民以和蒞  
任五年卒於官

張秉德介休人庚辰進士爲御史以敢言受知

宣宗累擢至光祿寺卿以股疾廢不起士論惜之其先世鶴山  
令策勲在官多異政山有虎患一旦負子去粵人盛稱之東  
序字寰洲其宗人也官甯夏同知勤於民事河渠有涇者輒  
捐貲濬之耗金巨萬不少吝惜

王汝珽字聖楮汾陽人由部郎出爲楚雄知府值歲饑捐廉  
以賑道光初夷匪滋事竄入府境相機堵禦屢有斬獲夷尋  
就撫遭母憂服除改知台州府以疾歸卒年八十弟汝珙干  
總居鄉有行誼汝琛字獻其官至大定府知府亢直忤上官  
被劾尋起白鹽井提舉夷匪之亂率勇堵截擒獲甚衆會疾  
作歸里卒

以上汾州府

李勣高平人嘉慶丁卯舉於鄉知甯晉縣縣故有潞河之役  
時妨農事兼以吏胥侵漁入爲民累勣爲祛宿弊立盡繼舉

平鄉亦有惠政民立祠祀之以忤上官改遼州學正  
田體清字鑑堂陽城人戊辰進士官益陽知縣性嚴正聽訟  
明斷人莫敢欺甲與乙爭產構訟各執萬厯年印契經數任  
不決體清審視曰乙契書避

廟諱此後造之僞契也乙駭然服蒞職三年案無留牘吏治  
肅清告歸主講書院以終

楊乾初字葆元陵川人舉戊辰鄉試署甯洋知縣治獄詳慎  
民服其平補邵武興學課士力行保甲縣境有天羅礮者俗  
號小臺灣匪徒相依爲奸按誅其魁濱海肅然甲午大水力  
拯災黎籌米平糶以佐賑積勞成疾卒於官工詩著有乾正  
集

劉湜字持正陽城人己巳進士除武安知縣時滑縣教匪初

平賊黨有逸入太行間者甫下車編戶口嚴保甲奸宄懾跡  
游擢同知署南澳廳厯太平安慶池州知府道光癸未江淮  
大水提悉心籌畫勸富民輸粟佐賑復捐廉購綿衣以御冬  
所資送流民及留養者至數萬遠近惠之以平反休甯潘氏  
獄忤當事論罷起補廣東連山廳同知在任四年以廉能稱  
弟灝字持舟諸生性恬澹嗜學工書著有廣月軒集

劉丙初名溥字石久陽城人由副貢授繁峙教諭擢舒城知  
縣調繁懷甯值大水濱江塌田衝決募民搶護立風雨中七  
晝夜得無患繼宰宣城水災後蝻孽叢生竭力捕滅歲獲豐  
稔兩縣民德之遷同知署太平府江水漲沒民居捐廉佐賑  
全活以萬計粵逆竄九江以知府奉檄江北防堵未幾安慶  
繼陷丙安撫難民風雪中不勝其苦積勞卒於防所善書畫

篆尤工得者多珍之

祁璿字松軒高平人丁丑進士選庶吉士改長甯知縣調新甯在官課士勸農力與教化民以訟至情道理論不輕咎決其奸惡無賴皆密訪而冊識之有犯案名捕之予重懲羣驚爲神署碣石廳值饑疫捐廉振恤遷知金州弟墳督兩廣改官雲南以疾歸

劉玉衡字星垣鳳臺人由安陽縣丞擢武陟知縣少貧嘗賣卜於縣凡地方利病民俗情僞皆所熟悉訟平政理卓著循

聲奉檄治河水發被溺卒

以上澤州府

李晶靈邱人性豁達有材智由拔貢補石泉知縣署甯陝廳同知時值叛兵滋事相機設伏得解城圍民賴以安尋遷孝義廳同知歷署邠州及鳳翔興安二府旋升嘉定府知府所



至有政聲

府大同

許師賢字齊之偏關人戊辰進士任上猶知縣多善政充庚午癸酉鄉試同考官母老乞養歸主講郡城書院以終府武李繩宗字子貽平定人舉嘉慶丁卯鄉試第一授永甯知縣縣境多山惟濱洛田舊資灌溉渠久廢繩宗出廉俸修復享其利者數十村嘗署碓山及正陽並有賢聲

鄭瑀字碧峰平定人壬戌進士除保安令拯濟荒歉振興學校鑿山石導泉水溉田數十頃民惠之厯署房陵竹溪皆有聲

武本洛字建中孟縣人舉戊辰鄉試官長甯知縣以廉惠稱嘗署平遠鄉民以爭渠構訟累任不決本洛至方傳訊聚而譟者至數百人召其老者嚴斥之始稍懾案亦結繼復有以

萬金屬縣尉來賄者亦拒弗納於是清直之聲達於上下因病致仕歸貧苦如諸生閉戶著書終其身

劉垂緒字裕甫平定人己巳進士授永康令歲旱糧價騰湧捐千金賣米平糶復請於上發倉以濟之民無流亡嗜學愛才於寒素體恤尤至

宋淇字浩川樂平人庚午舉於鄉歷河陽祿勸知縣問民疾苦興利除弊調署龍陵廳升姚州知州所在民頌之告歸卒年八十五

劉登榜字棣華平定人辛未進士授豐順知縣潮俗素悍其頑者有爭訟輒令婦人出首不爲怪下車嚴禁之近城有山產薪材土豪某強據爲己有黃緣前任刻石爲徵無敢樵採廉得其實立命毀石入官政聲甚著告歸以厭吏事改就平

陽府教授卒於官

張汝樂字虞夔平定人庚午鄉薦以大挑知縣借補易州州同歷署涑水望都以清直名告歸囊橐蕭然士民爭贐之卻不受起知固安政聲尤著

李兆元字鏡軒孟縣人領丙子鄉薦任咸甯知縣富室余姓因事餽銀巨萬拒弗受有以匾榜贈者亦力屏之以最邇汚陽知州水溢爲災稟請發帑賑恤崇陽民變戕官方署興國州奉檄馳往剿撫擒治首惡數名辟戍有差餘悉諭令歸業屢獲巨盜由白河同知擢知府署安陸府所屬潛江民變往諭之卽時解散軍興綜理營務積勞成疾卒

蔡子璧字耕石平定人庚辰進士授戶部主事遷員外郎轉廣東道監察御史乞養歸母憂服闋起補原職海疆不靖上

疏言和議之非指陳明確

上嘉之卽授天津府知府到官募丁壯修船隻備器械不數月而練勇數萬海口有備在任二年多善政父艱歸里咸豐中州設局鑄鐵錢未幾錢皆壅滯百物騰翔偕州中有紳權銅鐵並行法變通之一時利賴焉卒年八十二

賈士達字微聞平定人庚辰進士除西甯令遭旱蝗苗皆槁死發倉平糶而教民種芋至秋芋頗豐收民賴以不餒縣有二城東城舊爲宣府通判治有文廟因增設東川書院倡捐膏火以培文風以最當遷性廉靜不樂仕進引疾歸

以上平定州

焦維域字鎮孚忻州人嘉慶己卯進士選庶吉士改江油知縣充道光壬午蜀闈同考官七年署馬邊同知會營兵傷夷人欲爲亂游擊某擬用兵維域止之單騎往諭戮茲事兵丁

於境夷衆解散時藩司某聞夷地五歸填產金欲開鑛維域  
以爲不可弗聽員弁皆貪利深入爲夷人所逐竄逸始免藩  
司慙因遷怒維域調署納谿又調崇甯未之任被劾改教職  
歸州

徐寅第字虎臣五臺人嘉慶辛酉拔貢歷知肅甯威縣絕苞  
苴嚴請託風裁冷峻疑獄一訊卽決案無留牘尋補故城教  
匪事起偵知賊目郝振芳將赴滑縣掩捕獲之並其黨四十  
人悉置諸法調河間道光初遷順天西路同知尋攝河間知  
府勤於民事政平訟理如其治縣時值癸未直隸大水督屬  
吏查災分數必實戶口勿漏計費帑近二十萬米稱之司議  
以爲太多宜減寅第堅持不肯卒如所請災黎得免溝壑督  
修河陽各工蔣勵堂相國時爲總制工部侍郎程含章奉

命查辦直隸水利皆歎其實心任事在職八年升清河道兼署按察使治獄勤慎往往漏下三鼓猶披牘操管不輟爲屬吏誣陷逮問遣戍尋卒

鄭永修字慎齋崢嶸縣人己卯進士授閩鄉知縣廉靜愛民有清直聲母喪歸起知廣西來賓縣地雜蠻俗多方開導久之咸遵教化元夕張燈徧戶胥以官清民樂四字書其上尋判柳州府擢知全州值湖南會匪竄徧州城躬率兵壯晝夜防嚴賊不敢犯以積勞嘔血卒

以上代州

王文鳳字成五保德人舉嘉慶庚申鄉試官至雷瓊兵備道性曠達讀書曉大義居官所至有賢聲家四十餘口廉俸所入無私蓄清潔之操可以想見

苗席珍字崑田河曲人丙午舉於鄉歷榆次訓導渾源州學

正終於蒲州府教授事親克孝備極色養在職修理文廟周恤寒畯從遊者恆滿學舍精於三禮之學所著有讀書見解鄉黨備文等書

蘇光生河曲人由行伍擢把總從征平石峰堡逆回積功至陝安鎮守備教匪起勦賊湖北克復竹山縣戰蠟玉河羊角山並有斬獲遷紫陽都司署甯羌游擊嘗追賊至巴洞腹中矛卒力戰破之而由是不良於行告歸

以上保德州

王鳳翰字小蓬安邑人舉嘉慶辛酉順天鄉試以內閣中書入直軍機己巳成進士擢戶部主事調禮部歷員外郎郎中派鞫林清逆案執法平允盡釋株連母憂歸服除復官禮部出爲荊州府知府修得勝台以防水患葺荆南書院捐廉生息以資月餼並增孤貧口糧士民咸感戴之調武昌府兼

鹽法道擢雲南池西兵備道所至有聲子鍾員外郎官至羅定州知州著有澳門紀略行世

楊朴字尙之夏縣人己巳進士由國子監學正授臨城知縣勸農桑減徭役督課士子捐俸爲賓興資調清豐以卓異擢知磁州乞養歸

仝卜年字子占平陸人辛未進士以知縣厯官至臺灣知府所至建學校修城垣撫流亡折疑獄剔奸宄皆以最報宰彰化時俗多械鬪有陳姓者結黨據壺廬墩衆至萬人卜年間之一晝夜急馳二百餘里曉以利害立即解散一時有生佛之稱性警敏好學爲文有奇氣尤工於詩

郭醅章安邑人辛未進士厯知鄆縣及鎮海縣台俗獷悍動輒械鬪醅章爲係教務以德感久漸歸化在鎮海濬渠修隄



從虞家堰旁砌石爲楔每值江水漲流開楔引水灌田萬頃  
民呼郭公楔遷橫州知州子迎暢舉人渾源州學正

劉斌字琢山夏縣人甲戌進士知長陽縣勤慎愛民愚頑咸  
化囹圄一空職滿卒於官貧不能治喪百姓爲出資棺斂送  
之歸時有鄉民以事忿爭赴訴於縣競呼劉青天及知斌沒  
相與感泣言於後令願罷訟後令朱亦爲之歎服祀長陽名  
宦

薛用勉字果亭芮城人以選貢官陝西川楚教匪起轉戰漢  
中興安屢破賊擒逆首楊英由軍功歷渭南縣丞岐山知縣  
尋調長安擢知商州甯陝之變當事以其知兵檄署興安府  
多方設備民賴以安子愈炳官新城知縣亦有政聲

王林南字榮東夏縣人由廩貢署趙城教諭解橐金數百爲

諸生資興資後官大同復捐金修文廟置祭器乙丑荐饑散

聚焚券鄉人尤德之卒祀鄉賢

以上解州

潘貢疇字錫九絳州人事親以孝聞舉嘉慶丙子鄉試授安邱知縣廉勤有政聲值旱蝗驅捕甚力災而不害民賴以安聞絳重修文廟卽遣使捐二百金並與書執事曰昔爲貧而仕今仕而仍貧命也後以年老罷歸

趙雲鵬字圖南聞喜人官兵馬司指揮政臨詢知縣歷署諸城及東平州所在有惠政東土士人競爲詩歌頌之少好學家故有社爲先達會文所雲鵬更集資廣爲二社極文譙之樂遇地方義舉皆傾囊以助云

以上絳州

白上采字禮庭永和人癸酉選貢授屯留教諭薦擢知縣嘗署東臺決獄明敏有治聲調攝豐縣縣鄰山東多盜稱難治

廉知捕役李某故綠林之雄也黨與數百人盤踞兩省間陰縱爲患擒置諸法自是盜亦遠屏閭境安謐民有戕其子而誣陷爲某甲所殺者聞哭聲覺有異驗狀知其果僞也一訊而伏人驚爲神厯署蕭縣及興化嚴核隱賦以清錢漕力遏捏荒以杜姦蠹所在政績丕著好學工草隸於天文地理醫卜星相皆能通曉杜文正公督學時嘗亟稱之

州

右嘉慶年六十三人

又四人附見

郝文光字志山榆次人道光壬午進士厯知泌陽虞城杞縣所至興文教恤窮黎訟至立決人稱其惠調祥符以最擢浙川廳同知署光州知州尋告歸性坦直輕財尙氣在虞城代前令償帑金鉅萬杞縣亦然里居教授年踰八十卒

王燕堂字蘭圃榆次人道光癸未進士選庶吉士改廣平知

縣有政聲調繁鉅鹿以事罷起補仁和母憂歸浙民走送者  
相屬臨江酌水以喻其清海上軍興甯波諸郡戒嚴奉檄防  
堵紹興供應軍需以勤敏爲劉玉坡撫部所獎事平保薦遷  
南澳同知旋擢守潮州府署惠潮道調廣州知府父喪起知  
雅州府遷成都署川南道歷官數十年連典首郡諳練有爲  
一時大府倚之如左右手云

武新銘文水人丙戌進士除甯陽知縣到官嚴治盜賊時匹  
馬徧歷村堡相地形聯保甲巡緝有方奸宄屏蹤海疆不靖  
大軍南下所至苦供億新銘令社各置車官給值備徵發事  
辦而民不擾甲辰旱蝗躬親驅捕遂不爲災在官數十年家  
無恒產廉潔爲一時最調商河未逾年卒

武新亭字芸渠新銘從兄也癸巳進士選庶吉士授編修易

名雲衢典丁酉江西鄉試轉御史出爲青州府知府滿兵駐防歲需兵米各屬苦賠累量爲裁減汰陋規禁餽遺與屬吏以清操相勵嘉惠士林捐廉增書院膏火用是寒畯咸奮於學頌聲徧於齊東云

閻慶元字春亭榆次人家貧嗜學自少以氣節自負由乙未進士宰清澗朝繁甯夏所至勤恤民隱除莠扶良清潔之操久而彌勵擢靜甯州知州未任卒

王如蘭字心農清源鄉人庚子魁於鄉擢令邵陽懲蠹役革陋規明於聽斷精法律而時附以經義甫三月清積案數百民頌之遭父憂歸相與豎碑以志去思會當事設局太原籌捐軍餉檄與佐辦事竣部議優敘尋疾卒性好學工文善書家居多行義其創闢梗陽書院尤爲士林所頌云

王道立字子脩文水人甲辰進士以知縣需次關中歷署同官西鄉蒲城補懷遠調大荔未幾卒性廉介不苟所至愛民重士以厚風俗興教化爲先務在蒲尤多善政民有淫人婦而殺其夫者婦不知也事發民畏罪自縊死拘婦至方研訊婦忽作鬼語歷陳被殺狀按驗竟得其尸一時驚異

王恒德字用占文水人由實錄館議敘經歷累擢至密雲知縣廉謹自持不妄受一錢所至以清著密雲城瀕白河值山潦盛漲隄且潰城中洶懼恒德立隄上誓以一身爲閘城生靈請命不移時而漲落軍民相慶更生卒於官囊橐蕭然幾無以斂云

以上太原府

張兆泰字彙征臨汾人癸未進士學博品端質直好義後宰新野歷署南陽鄧州釐剔奸弊潔已愛民士庶相與尸祝弗

山西通志卷一百五十二 仁賢錄  
一五  
袁

衛佐堯字唐牧曲沃人舉戊子鄉試第一由大挑補商州同  
厯署山陽清澗知縣監掌剔爪不名一錢林文忠公撫陝  
擢治行第一將薦之會去陝不果佐堯尋卒於州商民感其  
惠祀之名宦著有從容堂詩集

衛緒煥字文泉洪洞人己丑進士任新河知縣母憂歸廬墓  
三年起知濱化遷隴州知州居官情正自守性情閑雅輒以  
詩酒自娛致仕歸旋卒人皆稱其德著有詩名詩草

文在瀛曲沃人癸己進士除臨城知縣調井陘所在有循稱  
膺卓薦以知州銜同知大名府

蠶聲玉字元音曲沃人以兵馬司注通兄聲煥官湖南監司  
從之署粵西徭匪趙金龍叛調湘軍會勦請於兄率鎮軍道

標練勇赴衡軍督戰建奇功賊平以積勞卒於軍次卹贈都察院經歷蔭子九之以主簿用

葛德新浮山人官大荔典史以拏獲張格爾逆黨送部引見奏對稱

旨特升滄州知州會當事興辦義倉以州民差徭繁重請白捐穀三百石爲民乞免再請再駁不得已以其故諭諸民咸感其德踴躍樂輸得穀五千石銀三千餘兩擇地建倉費不敷復捐廉足之事竣獲優敘未幾以憂去尋卒於津門

谷雲階字初躋太平人知建水縣蒞任卽議開銅鑛得三十六洞以裕鼓鑄瀘江暴漲壞民廬舍爲築隄衛之自是永息水患興學課士平反冤獄一時有循良之稱少孤母教之成立鄉居多義舉時以母命爲之



裴驥字雲衢曲沃人任瓊州府同知甫到官陵水萬州等處  
黎人告變驥約崖州副將夾攻之始定瓊屬十三州縣列布  
如環黎居其中負山險時常滋擾驥擇邱文莊海忠介撫綏  
要條請令海口禁米穀出洋以藏富爲戢奸之本識者燧之  
引疾歸道光丙午歲稔糴粟賑饑鄉里稱惠

裴驥字鐵軒曲沃人官楚雄知府廉勤有幹略職滿以親老  
乞養歸既免喪仍以知府需次於滇署曲靖再署麗江姚州  
回漢互關州牧請兵大府以驥習知民情檄令彈壓聽開誠  
布公示以恩威利害凶饑頓息未幾卒於官

文增字爽齋曲沃人由部郎出爲雲南知府署麗江有善政  
未幾擢守潞江興學勸農行以實心遇歲饑捐廉佐賑民惠  
之謝病歸年踰七十卒

衛爾福曲沃人以武生歷鳳凰廳屯田守備黔苗民倡亂奉  
檄守甯遣諸處日夜防剿積勞卒在官廉潔身後羈棺異域  
歷十年子丕承始貸資鄉里徒步往貢骸以歸

侯庭樾亦農臨汾人由部郎授鄖陽知府粵逆北竄警報  
日迫率僚屬設守禦具人賴以安時江漢水漲蕩民廬舍悉  
築隄而賑其被災者旣而武昌失守調赴軍次治饑從復城  
以功賞戴花翎後擢甘涼兵備道旋升按察使未聞命而卒  
董麟字雲舫洪洞人由選貢歷刑部郎中決獄明慎多所平  
反總辦秋審值夷務初定奸人輒以吏民身經從逆誣陷株  
連羅織成獄固不容麟憫之謀諸弟文煥令上其事請  
旨嚴禁人情乃安性坦易喜交遊遇事持以鎮靜同官多推  
之以知府需次河南旋因母憂成疾卒於家

以上平陽府

姚希元萬泉人辛卯舉於鄉以大挑知縣歷署交河樂城南  
津廣平所在有政聲旋授阜平令力興文教鄙朴之風爲之  
丕變調滿城益勤於治告歸優游林下幾二十年府  
楊上達字省齋長治人事繼母有孝稱性明悟學行爲一時  
所推登甲辰進士授白水知縣勤於政事終日坐堂皇民以  
訟至立決無煩苛羣稱爲家長官歷署宜君同官安塞紫陽  
膚施並著循聲忤上官罷卒於西安

馮季曾字偉度屯留人官河工縣丞歷宰河間吳橋遷石景  
山同知在職耿介自守聽斷公明辦理隄防夙夜勤勞所至  
民頌之以卓薦遷正定府知府告歸家居值軍興督辦團練  
歲輸正賦外舊多浮費言於當事裁減之人感其惠

楊中桂字丹林屯留人領丙午鄉試解額署東鹿知縣值旱

視撫恤災黎仁心實政惠澤周浹再署懷安亦有政聲梟匪不靖近畿州縣時被竄擾中桂方權豐潤賊素悉其賢相戒不犯長於聽斷訟至立決一時翕然稱爲神明補棗強未到官卒

趙龍門字琴生長子人少有雋才由選拔歷通道安福麻陽興甯祁陽知縣以惠政著尤善折獄訟至立決法不嚴而民畏之後官涖浦捻匪猖獗防禦甚力邑獲安堵好學工書翰嘗題座右云隨分且勞經世事偷閒還讀濟時書遷施南府同知未任卒

劉漢美字榆園潞城人少負躬耕養母壯遊京師供事實錄館授湖州府經歷能舉其職海防事起某帥調佐戎幕屢干以策擴不用歷攝歸安德清諸縣所在有政聲素尙氣節不

能與時俯仰著無聊集以見志卒於官行橐蕭然妻王氏資女紅以度光緒初歲履愈不能存或勸就食粥廠悵然曰吾廉吏婦也忍受蹴爾之辱哉投繯死

以上漢安府

張其信字芳余汾陽人性誠篤事母孝勵志問學文名藉甚由辛巳舉人知東鄉縣歷署樂至西昌什邡及天全州所在以廉能稱卓薦當遷以老辭歸優游林泉以終

趙訥字質甫汾陽人舉壬午鄉試爲人樸誠寬厚篤志於學司訓山陰勤於其職士風丕振撫郡梁稱其品端學粹將薦之以年老辭旋告歸諸生祖餞相屬有至雁門關猶依依不忍別者

范泰初介休人壬辰進士授鄆城知縣營弁某與縣人曹姓有隙誣訐其習白蓮教上官飛章入告勒兵剿捕泰初挺身

力白其冤免株連者以千計遷龍巖州知州卒子夢蘭官平  
和知縣除奸詰盜有能聲亦擢知龍巖州

張從龍字子雲臨縣人癸未武進士一甲一名及第授侍衛  
擢連江游擊從辦海防處州鎮將托安泰戰死檄領其部駐  
招寶山夷船至方督兵力拒而提督余以衆退敵縱火焚山  
從龍突毒燄中焦灼徧體力疾護所部趨裕帥營俄而鎮海  
陷帥殉難坐奪職事平浙撫劉奏授守備留浙佐辦善後事  
宜咸豐中定鄞縣及奉化抗糧之變剿平仙遊會匪林俊之  
亂積功累遷至福州副將以老告歸陝回不靖率鄉團防堵  
西河當事甚倚賴之

高錫琳字紫川平遙人領辛卯鄉薦以大挑知縣署南安州  
鄰境土匪倡亂奉檄辦理令以兵勇從辭之匹馬直入其境

論以禍福反覆數百言衆懾服事遂平母憂歸不復出著有  
至齋文集

王臣福字介堂汾陽人舉丁酉鄉試授南川知縣縣界黔屬  
之正安桐梓值桐匪不靖之後黃白號匪借教惑衆盤踞正  
安接連數州縣黨羽甚夥臣福至卽籌守備舉辦團練共得  
十餘萬人各就地方分爲五百餘團精選首領嚴定約束暇  
輒親加訓練捐資獎勵多成勁旅總督王下其法於各州縣  
仿行之咸豐末髮逆石達開糾黨入川兩次撲城臣福督率  
紳民固守乘閒襲擊賊鋒屢挫始解圍遁在蜀厯攝劇縣署  
崇慶雅州諸府州並有政績爲川督駱文忠所倚任同治中  
擢任打箭鑪同知廳居極邊民番雜處向無學校不知讀書  
臣福於河東河西設義學兩所擇其秀者延師課之由是絃

誦漸興獷悍之習爲稍變踰二年以疾請代尋卒

楊映奎字星臣甯鄉人庚戌進士刑部主事洊升郎中在部十八年廉謹自持治獄詳審以親老乞歸家居凡同治河防光緒賑務無不竭力捍救不辭况瘁鄉人德之

以上汾州府

王士桓字公瑞鳳臺人丙戌進士知碓山縣俗獷悍健鬥至自晝劫奪獄訟繁興士桓清囚繫懲奸蠹飭捕務與民更始有犯者刑無赦由是盜賊屏迹良善獲安在官十餘年士桓懷德羣尸祝之所著有朗陵詩集

薛鳴皋字鶴亭陵川人壬辰進士授吏部主事歷員外郎轉御史居郎署二十餘年與修處分則例秉公持正胥吏不敢緣爲奸及官臺諫遇事敢言以剛直稱嘗捐金治澤郡會館修陵川廣惠倉利賴甚衆假歸遂不復出主講書院以終



王適昭字介明陽城人丙申進士授翰林檢討三充會試同考官轉御史母老乞養歸幼孤舅氏魏明經象權教育之及貴事之如父居母喪哀毀致目眚終身蒞職清慎恥於逐俗浮沈及歸里值粵逆犯懷慶督率鄉團嚴守各隘賊西竄垣曲經縣鄉南鄙卒不敢深入

張涵鳳臺人事繼母以孝聞由壬辰進士授新臺知縣值蝗雹爲災立請發帑振濟捐俸佐之親歷民戶實惠均霑繼知萊陽興學造士出俸金三千以爲培養之費用是寒畯皆奮興萊人口祝之

張林字扶春陽城舉人司訓山陰登戊戌進士歷招平懷遠知縣政聲卓越軍興調糧臺佐營務累遷柳州府知府亂後恤兵愛民百廢並舉以勞卒於官筮仕三十餘年遽棄蕭然

貧不能葬鄉里哀之

祁爾誠字竹岩鳳臺人乙未進士知興國州值歲饑民貧逋賦悉爲代完一時有衆母之稱好學博覽典籍堪輿醫術靡不宣究

延彩字子筠陽城人甲辰進士署永清令縣疊遭蝗旱甫下車冒暑驅捕備極勤苦因之積勞成疾補博野未任卒著有簡齋詩草

韓懋德字厚菴陵川人甲辰進士歷青田分水知縣有惠政充浙闈同考官得士多名宿俞太史樾其選也改禮部精膳司主事告歸教授鄉里以終

以上澤州府

武榮字次南陽高人丙戌進士授刑部主事讞獄以明敏稱歷員外郎中出爲福建鹽法道值陞務疲敝當事者奏改僉

商舉辦之始頗累富民業悉心籌畫至於焦勞致疾遷貴州按察使到官廉得黃平苗匪聚黨肆掠時胡文忠公林翼方攝守鎮遠請於黔撫檄令剿捕擒賊首保鷺並其黨二百餘人未幾黃平劫案上聞

旨下而地方已肅清矣擢江蘇布政使咸豐初以疾歸

常山鳳渾源州人道光辛丑進士筮仕江西歷署安遠貴溪知縣建昌府同知與丙午辛亥鄉試分校補餘干縣修書院以振文教濬壅河以興水利誥奸除暴訟簡風清政聲甚著己酉庚戌迭遭水患力請蠲賑以拯災黎復倡築長隄俾田廬卑窪者資捍衛焉縣人惠之祀入名宦

票烜字小園渾源人恭勤公子也由刑部員外郎歷郎中出爲廬州府知府到官卽訪擒地痞郭二虎等置諸法蘇民李

某爲商夥郝所殺沒其金六百已葬矣廉知捕郝至一訊而  
伏郡人驚爲神明調知安慶亦有政聲母憂解任服除補平  
涼知府回匪滋事鎮軍不能制往諭解誅其渠餘黨悉定釐  
奸剔蠹境內肅然調蘭州府會營兵以缺饋五十餘萬伺藩  
司出圍而譁焉烜立馳往許以至府關領而徐集其弁婉諭  
令靜候皆聽命後數月饒亦至一軍獲安署甘涼兵備道遭  
祖母憂歸尋卒

以上大府

陳士枚字勿齋平定州人丙戌進士由部郎出守荊州歷遷  
至陝西巡撫嘗陳梟八閩捕誅海盜五百餘名以利商船節  
江大堰舊動義倉穀變價歲修士枚任藩司爲別籌經費俾  
倉儲無虛而隄工亦以時舉及奉

命撫陝甫到官以前任山東運使積案被議落職歸尋卒

曹汝愚平定州人舉王辰鄉試歷署房山平谷懷來知縣房山產煤民爭於利又地多旗租事尤糾紛因之獄訟繁興汝愚至剔奸釐弊案牘一清萬全墾荒一案構訟歷十七年汝愚方署懷來奉檄往勘一訊而結其敏決若此尋宰龍門邊外地瘠民貧一意拊循甚有惠聲未幾卒

王奇祥孟縣人舉甲午鄉試官濟甯州州同以廉勤稱會大水煮粥濟饑不避勞瘁杜文正公時查災獎之俾總理所屬賑務

張觀藜字芸閣平定人乙未進士補彰明知縣川中回民聚族而處獷悍習爲劫盜各有旗號觀藜練鄉勇會營弁請於大府期一舉剿除匪黨聞風懾服誓不敢復犯鄉俗勞疫死與貧不能葬者悉棄尸山谷聽糜爛爲捐棺槨收而瘞之自

是陋習遂革其他善政多類此以老乞歸性好學工文辭鄉  
舉歷三十年始捷南宮壽陽祁文端公少時嘗從之遊

寶文標字曉霞平定人由副貢補宜山知縣甫抵粵值逆賊  
石達開自金陵南竄直逼桂林奉檄分守厯月餘始解嚴到  
官撫瘡痍詰奸暴廉得土匪小王氏通賊狀按誅之急繕守  
禦具部署方定而石逆已由鄰邑來犯激厲士民扼隘固守  
身染疫猶力疾與賊相持得保無虞旋卒

耿垂紳平定人已亥鄉薦任文安知縣粵逆竄畿輔轉饒軍  
前僧邸與語器之因留辦糧臺芻粟飛輓綜核得宜其在文  
安力行保甲督鄉民興築寨堡其後梟匪肆行人恃以無患  
張書璽字韞堂孟縣人辛丑進士署連平州及高明電白縣  
所至以廉謹稱虧帑被誣論罷事白復原職署石城縣值粵

西土匪竄擾邊境騷動書璽泊鄉兵計擒賊渠朱十四餘黨潰走民獲安咸豐初題補陽江及廉州告警大府知其能調署靈山相機防禦未至遭憂歸尋遭疾卒

趙嵩年字中麓孟縣人由貢授臨汾教諭歷任渾源州學正壬辰歲被偕州守王勸捐賑濟作救荒歌示富民讀者感激不數日得米四千石設局散給實惠均霑民德之以老乞歸著有雲淙詩稿

以上平定州

劉視遠字惟明忻州人己丑進士以知縣分發河南乞養歸母喪除亦不復仕渾源栗恭勸公時督河東寓書相勸堅辭以疾家居好施予癸巳大祲糴穀萬斛減價平糴州人賴之咸豐中粵逆陷平陽佐當事籌軍儲敘功加同知銜

忻州

馮晟字百史代州人由舉人官麗水知縣歷江山建德所至

有政聲尤善聽斷訟至立決道光初德清徐氏獄起按察使  
王某至於自裁高平祁尙書墳來浙覆訊特檄成令研鞠盡  
得其情遂平反之戊子建德大水拯溺振饑帑不給出家資  
以濟全活甚衆以積勞成疾卒少好學喜吟詠大江南北諸  
名宿多與之遊著有涉江寄巢人海諸集子壽椿諸生官鹽  
大使壽椿字仲翔生有至性幼喪母哀毀如成人溺苦於學  
治經有法父憂遂絕意仕進子焯潛山縣丞

朱壽字潤之淳縣人辛卯鄉薦知鄞縣廉明多惠政疏河渠  
糾奸盜均徭役皆以實力行之以歲饑籌賑積勞致疾卒于  
官貧不能歸鄞人賻金送柩旋里

王丕顯字伯康五臺人舉乙酉鄉試第一癸巳成進士以知  
縣分發浙江歷宰烏程富陽桐廬精明諳練所至有聲烏程



女賽金者其母不貞所私者謀並汚女百方誘脅不從強劫之女遂自盡已瘞矣丕顯訪得其實按論如律女以烈得旌屢與浙闈分校一時名士多出其門署長興時整興學校愛養士民尤多政績縣人爲製十奇之謠父憂歸以母老遂不復出

武訪疇字芝田崞縣人壬辰進士授清澗知縣歷鎮安渭南所至興利除弊留意教化咸豐初以獲盜功擢鳳翔知府憂歸服除起知西安府廉明勤慎遇事有關於國計民瘼者必力言於大府見諸設施治行稱最遷延榆綏道母喪解任遂不復出主講西河書院以終

李毓馨字叔國崞縣人丙申進士歷知綏陽龍泉諸縣所至輕徭役平獄訟勸學課農以廉惠著尋判歸化擢知定番州

未幾卒於官囊橐蕭然士民爭賻之送柩歸里

張棣字夢樓崞縣人以進士知完縣歷吳橋靜海修書院繕城郭恤孤貧興水利捕巨盜澤枯骨政多實惠所至有聲性好學篤於內行著有文集及遺病枝譚

趙光楷字笏山崞縣人戊戌進士歷汧陽涇陽知縣勤明多惠政諫長安值粵逆竄入武關會城戒嚴光楷練勇籌餉嚴爲防守當事甚倚任焉擢知商州商爲荆楚要道滇逆方擾興漢而捻匪復自襄樊北竄軍書旁午供應浩繁積勞成疾卒于官

蘇傳鉢字紹衣崞縣人性孝友學問淵博己亥舉於鄉司訓定襄教育諸生甚有風範武樹葵亦以舉人官甯武教諭經術課士造就甚多學使皆嘉與之

張騰霄五臺人由癸卯武舉擢九江鎮標右營守備九江已失守兩營收潰兵屯於近郊騰霄始至謁右營遊擊某方短衣卧帳中吸鴉煙弗爲禮騰霄怒捉之起面斥其過兵弁爲婉解乃已時營中缺餽數月騰霄撫恤之甚厚及饑至所部兵皆願一戰每出擊賊身先陷陣左右衝突當者輒靡江撫聞之檄署建昌都司並督帶鄉勇時江西諸郡皆陷以孤軍支楮其間大小數百戰擒斬無算歷三年賊竟不能近城會鄉勇有通賊者謀爲變偵得急擊之殺數百人亂乃定身浴血氣薰蒸暈絕良久乃甦病數日而卒恤蔭如例

宋爾杰字廣軒崞縣人由廩貢授太谷教諭勤敏稱職時出資周恤寒士舊有學田爲土人侵沒爾杰復之歲取租息以

爲鄉會試卷資士林稱之

以上  
代州

賈益謙字芸樵夏縣人甲午舉人以知縣需次江蘇歷宰劇邑以幹濟稱在靖江值水災設法拯撫民無流亡咸豐癸丑粵逆陷鎮江蘇常戒嚴益謙時署陽湖練丁防守賊不敢犯局勇有潛通賊謀內應者偵知之擒獲僞丞相姜某及勇目張大受等梟示城上賊氣沮終益謙任不敢犯已未震澤民抗糧聚眾數千大府檄令鎮撫羣弭首聽約束卽日解散踰年蘇常不守奉檄督辦靖江如皋諸縣團練防各江口杜賊北竄旋署松江知府同治初賊數萬來攻會營弁并力拒之發大礮晝夜轟擊踰兩日賊稍退會援軍至內外合勦連戰十餘日大破其眾僞聽王陳炳文僞納王郅永寬皆負傷遁擢道員歷署江蘇按察使訊結巨案時稱明允子瑚有幹略由己未進士授編修視學湖北轉御史巡視北城出知登州

府並著政聲卒於官

趙德轍字靜山解州人乙未進士由知縣累遷至江蘇巡撫署兩江總督勤能清潔所至有聲中外倚重日爲東南保障致仕後兩親皆健在色養備隆角巾野服與鄉人齒見者不知爲達官也

郭椿壽字靜山安邑人領癸卯解額尋成進士由編修外擢知府雷州有諸生二人爲富豪賄陷坐通海盜置重辟椿壽方攝守廉得其誣遂平反出諸獄大府先入豪言持不可卒昭雪之旋調廉州府以屬縣鹽山失守論罷尋由軍功復職積勞病卒

張廷奇芮城人官鄧州同知有循聲調靈州建花馬池議倉歲歉代償通賦池產鹽常駐重兵遇有調發民苦供侍廷奇

爲詳請裁革衆德之遷西和知縣張逆之變大軍西征縣當要衝別定支應章程簡明易行兵民咸稱爲便

劉振中安邑人由丙午舉人任榆社教諭咸豐己未成進士授戶部主事改武強知縣下車時見城垣坍塌無遺亟集士商捐貲倡築工竣而捻逆渡河北竄畿南諸郡蹂躪幾遍獨武強恃以無恐鄰邑百姓趨城獲全者不可勝計爲政尙簡易仁恕愛民縣人戴之久而不忘

張清瀛字海峰夏縣人丁未進士授溫縣知縣正直廉潔深得民心粵逆竄河北攻懷慶不克屢擾縣境率練勇卻之賊目號大頭王者驍悍善戰爲勇所殺並擒其黨百餘名自是不敢復犯旋以母憂歸服除以轉讓功薦擢知州署陳留縣分校癸酉鄉試所在有治聲

以上  
解州

杜友李字蓮浦河津人援例授安南知縣縣苗民與永甯州人爭水利訟久不決友李購地開塘中界石梁平分其水羣歡頌苗民亦立碑誌感調興義尋升古州同知建書院興學課士增設榕江渡船秋冬駕浮橋以利行旅署都勻知府下江廳有外來紅苗強奪青苗田青苗糾眾與之鬥斃紅苗數十友李奉檄查緝以苗相爭利無他變乃懲其爲首者餘不問出資給紅苗令其回籍皆奉約束維謹補黎平府厯署貴陽安順加道銜告歸家居歲歉出粟賑貸鄉里惠之

以上絳州

右道光年六十九人

又五人附見

袁承業字紹庭翼城人咸豐癸丑進士入翰林丰度端凝砥礪名節由編修轉御史知無不言章數十上大半皆理財用人有關政要或事涉宮禁尤汲汲於杜漸防微直言不諱

朝廷皆嘉納焉引疾歸主講晉陽書院踰年卒

董文煥字堯章洪洞人咸豐丙辰進士入翰林授檢討同治壬戌癸亥兩充會試分校先是同治初元畿輔方解嚴姦人輒以前曾從逆誣陷平民拘捕囹圄幾滿吏役緣爲奸株連盜竄文煥充講官得言事疏請嚴禁人心始安關陝多事嘗奏陳山西防河事宜飭下撫臣行之又奏六部考課章程及山西地丁多未盡一各州縣地祇隱藏影射諸弊皆下所司議行出爲甘涼兵備道道經陝西爲陝撫奏留委辦山西米捐總局事竣保加鹽運使銜父憂去官服闋復授鞏秦階道道署從前駐岷州經回匪亂移駐秦州時值兵氛之餘且回漢雜處招徠安集事多草創乃以鎮靜持之察纖析毫不期年而具舉創建隴南書院公餘躬親考課文教大興舊例陝



甘鄉試同闈光緒乙亥經制軍左文襄公奏准于蘭州別建  
試院分闈鄉試文襄素知其才兩科特調監試復總辦釐金  
局有以蜚語媒孽者因避嫌力請去位文襄廉知其誣待之  
益優嗣聞本生母訃未及歸以毀卒好學工詩著有聲調四  
譜集韻編雅及研樵山房詩集行世

傅寬臨汾舉人樸誠端謹嗜古好學由大挑選解州訓導清  
廉自守教育有方學者宗之

徐璵慶字蓴梅臨汾人官同州府經歷同治初回匪圍城甚  
急偕守令登陴協力防禦親發大礮斃賊圍解敘功擢知縣  
薦升知州宰韓城奉檄巡查河防沒於役弟篤慶當同州戒  
嚴時隨兄守城不忍舍去尋以需次人員委監粥廠授醴泉  
典史未任卒

李偃臨汾人偃師知縣嘗試令宜陽時捻匪擾境帶勇堵禦  
斬獲甚多民賴以安軍功賞戴花翎在官惠政甚多民爲刊  
清官歌以頌之嗣因幫辦西征糧臺積勞成疾而卒

仇恩注字叔俞曲沃人由供事擢知縣嘗率郛城值粵逆東  
竄土寇乘閒發率勇擒其魁餘黨解散黃河自改道北行時  
泛濫各路文報征兵胥迂道於郛事多掣舉措置有方厯署  
禹城膠州所至有治績而兩攝諸城爲最久嘗捐俸修文廟  
書院遇旱蝗設法驅捕民競勸功以其暇治鄉團築堡寨丁  
卯賴逆渡河肆擾率民拒守賊十犯城卒無恙調長清諸城  
民籲留格於例不許乃立祠祀之長清地曠闊捻匪出沒無  
常保境防寇以靜御紛民尤德之以勞績

賞戴花翎加運同銜旋遷甯夏府通判東撫從民請爲破格

奏留旋以疾卒

李大觀字雲樵汾陽人咸豐中以進士授萬全知縣遭憂去服闋起補信豐調萬載再調廬陵兼護吉安府篆卒於官卒萬全時值新疆告警諸軍出塞次張家口索借庫帑萬金及夫馬器具卒無以應乃謁轅求見其帥以爲萬全彈丸之地猝興大役民不堪命且庫藏支發有定不敢擅動而塞外缺水泉艱糧運萬不能進不如

奏請循山陝之北出榆林循賀蘭山以達玉門帥善其言意未決不三日得

旨乃盡拔營去喜曰不意書生初膺外任竟深識老謀若是及官江右所歷皆劇縣號難治專務德化頌聲翕然

冀唐封字桐生平遙人由教諭辦團保獎擢知縣補官災之

平利地通楚蜀縣南關埡汎扼其衝居形勝因捐廉築城設卡以資保障令四鄉實行保甲條上其事巡撫曾善之下其法於各州縣李官保過平利復上勦夷策數千言李以國士目之

張濟遠字雁峰臨縣人以增貢官湘鄉丞有治才卓薦升知縣歷署耒陽永定尋補湘鄉時粵逆猖獗濟遠練勇有方勦除賊黨鄰疆賴之以安權知桂陽郴州所至政聲洋溢民歌頌之後以軍功擢知府記名簡用道

李能臣字子廉永甯州人由武生起行伍歷遷雲南景蒙遊擊進廣東參將值會匪凌十八猖亂能臣隨營進剿設伏誘賊斬獲無算卒擒首逆以功遷淮西副將戴花翎旋擢雲南騰越鎮總兵尋改臨元鎮粵逆既熾調赴廣西協剿時賊踞

桂林之紫荆山率所部同諸軍分路進攻奪其要隘提督向議乘勝搗巢爲滿軍所阻踰數日賊復整由他道逸去諸鎮軍追擊皆失利能臣身冒矢石以出負重傷復染瘴病足遂引疾歸家居值陝回之變河防戒嚴當事奏請率勇駐防軍渡歷六年所在安堵疾復作力辭得代尋卒

以上各府屬

龐立忠字魯山孟縣人咸豐壬子進士署長樂知縣廉勤有政聲補長汀甫至而髮匪犯境城陷乃退守鄉鎮招集團丁連戰敗賊賊棄城遁立復之其別賊踞甯化者復糾黨來犯會營弁迎剿復敗之自是不復窺境乃招集逃亡拊循瘡痍民懷其惠尋以疾辭歸同治初起補浙之長興兵燹之餘一以培養民生爲務時以儒吏稱之所著有四書舉燭及粹說經彙集宦遊錄臨民錄魯山叢書藏於家

李晉亨字靜齋孟縣人任湖州府烏鎮同知清直愛民民呼爲李善人咸豐三年烏程令康某以催科激變衆聚至數千康懼奔烏鎮衆追及望見晉亨大呼曰李善人至慎勿相害諭之遂解散後值楚匪擾烏鎮晉亨團練防守誤陷賊中百姓力救得出不食數日而卒

白榕字蔭城平定州人由舉人司訓遼州粵匪由平陽東竄偕州牧籌守禦甚具賊下太行被裹逃回者道州境絡繹不絕營弁某欲殺以邀功榕持不可至詭爭乃止其後河北土匪闖入黃澤關大府檄令佐辦防堵事定獲臈卓薦尋卒張振新字少銘忻州人績學工文丙辰進士授工部主事同治初應

詔陳言四事語多切直中時弊以憂歸主講書院以終

張冲魁字枕參保德州人癸丑進士署商水知縣修城工建義學卓有政聲補授柘城兵燹之餘辦賑安民卒於官

武士選字升三安邑人乙卯領解旋成進士授工部主事改知縣宰南皮創建書院親課生徒縣西薛家灣爲運河要衝督工築隄水不爲患宋逆掠境督率紳民先幾防禦四境安堵縣人頌之擢同知加運同銜歷署河間大名同知及天津縣並著政績在大名值晉道大祲奉檄覈辦轉運輓輸迅疾民霑實惠未幾卒

李天錫安邑人知平度州免差徭減賦稅以惠稱調臨清奉委治河條陳疏濬事宜沿河居民均被其澤尋遷曹州府知府荐升登萊青道所在有聲卒祀曹州鉅野名宦平度臨清並有祠

李承恩天錫弟也官至廣西布政使少有大略儻不羣軍興由巡檢累功擢守桂林值洪逆攻城督軍登陴晝夜防禦賊不得逞月餘解圍去遷右江兵備道巡緝江面與士卒同甘苦所練勇皆勁捷敢戰號長勝軍艇會各匪聞風遠遁自洪逆北竄後餘匪未靖各省協饒不至而關稅地糧復難及額庫帑長空公私大困承恩既任藩司力籌變通恤民惠商勤求吏治用是度支稍給軍亦無虛糜云

尋鑾煒字管香榮河人壬子進士授編修充己未湖南鄉試正考官轉御史遷給事中在職明習掌故有所陳奏多關於國計民生丁丑山西大祲疏陳賑濟之宜朝邑相聞時寓虞鄉請就近起用委以賑務

詔如所請尋擢潼關道卒於官



喬守中字伯庸聞喜人歷知松滋長樂恩施諸縣勤於聽斷  
案無留牘粵逆警逼練勇防守境內無虞士民頌之以上各州府

右咸豐年二十一人

又一人附見

尋鑾晉字錫侯鑾煒弟同治壬戌進士選庶吉士改授肥鄉  
知縣嚴保甲勤緝捕民以訟至立爲判決兵燹之餘始得安  
業徵賦舊不足額詢知向設里催緣爲奸利悉予革除令民  
自行封納民踴躍歡輸未及冬已全數報解歷署懷安南皮  
及薊州保安所在興學勸農留意教化尤長於折獄遇有疑  
案往往一訊卽結民頌之未幾卒著有畿南宦遊草

武良銳字夢寅汾陽人壬戌進士由刑部主事歷遷郎中在  
職清慎明於聽斷往往引經折獄同官皆推之以爲得法外

意以上各府屬

郭建章芮城人由縣丞擢知鳳縣同治初關陝變起募勇丁修城垣備器械守禦甚具躬宿城上者五閱月其後藍捻各逆肆擾興漢漢中十一屬相繼陷獨鳳縣以力守得完民立祠肖像祀之

曹翰秀蒲縣恩貢任武鄉訓導時值荒旱奉檄辦賑實惠及民又捐貲煮粥以佐之一時稱頌

白菡字香亭永和人以通判需次江蘇嘗署華亭知縣兵燹之餘造士保民惠政洋溢施及鄰封與縣及奉賢金山青浦皆徵詩繪圖彙爲感發集以誌遺愛

以上各州屬

右同治年五人

山西通志卷一百五十二